

UMS pastikan pelajar selamat kembali ke kampus

UB 27.10.2021 P.02

KOTA KINABALU: Selaras pengumuman Kementerian Pengajian Tinggi (KPT) membenarkan pelajar berkeperluan kembali ke kampus, Universiti Malaysia Sabah (UMS) mengambil pelbagai langkah bagi memastikan pelajar yang kembali bermula 15 hingga 31 Oktober berada dalam keadaan selamat.

Naib Canselor Universiti Malaysia Sabah (UMS), Prof. Datuk ChM. Ts. Dr. Taufiq Yap Yun Hin berkata, antara langkah tersebut adalah dengan membangunkan sistem aplikasi UMS Shields bagi tujuan pengesanan tahap kesihatan pelajar yang akan tinggal di asrama.

“Sistem aplikasi yang dibangunkan kumpulan penyelidik dari Fakulti Perubatan dan Sains Kesihatan (FPSK) dan Pusat Pengurusan Data dan Maklumat (PPDM) ini digunapakai di kampus induk Kota

Kinabalu, Kampus Cawangan Sandakan dan Kampus Antarabangsa Labuan.

“Sistem aplikasi berasaskan web ini mampu membantu mengenal pasti risiko seseorang berdasarkan gejala dan sejarah pendedahan yang hanya membenarkan individu memasuki dan bekerja di UMS sekiranya berisiko rendah.

“Selain itu, sistem ini juga digunakan bagi pemantauan gejala harian serta pemantauan sendiri oleh semua pelajar yang kembali dan menetap di asrama kampus,” katanya.

Menurut Taufiq, sistem tersebut juga dipantau Pusat Kesiapsagaan dan Tindakan COVID-19 (PKTC) UMS bagi pengesanan awal gejala dan pengasingan pelajar untuk mencegah penularan wabak yang cepat dalam persekitaran asrama.

“Sistem aplikasi ini juga mempunyai satu modul diked-

nali sebagai UMS Passport yang berfungsi mengesan lokasi seseorang sepanjang berada dalam kampus, dan sistem ini juga boleh beroperasi bersama aplikasi Smart Hadir yang dibangunkan untuk membantu pendaftaran kehadiran para pelajar di kelas menggunakan pengimbasan kod QR.

“Dengan pengesanan lokasi individu, modul UMS Passport ini boleh membantu pihak PKTC UMS dalam melakukan pengesanan kontak sekiranya terdapat kes positif di kalangan pelajar dan staf,” katanya.

Sejumlah 5,268 pelajar termasuk 13 pelajar dari luar negara telah disenaraikan sebagai pelajar berkeperluan untuk kembali ke kampus, melibatkan 4,847 pelajar di kampus Kota Kinabalu, 219 di Kampus Antarabangsa Labuan dan 202 di kampus Cawangan Sandakan.